



Broj/Broj: 01-05-105/08
Sarajevo/Sarajevo:23.4.2008.godine

**Izvještaj o zvaničnoj posjeti predsjedavajućeg Predstavničkog doma PSBiH
Milorada Živkovića i zamjenika predsjedavajućeg Predstavničkog doma PSBiH Nike Lozančića
Sobranju Republike Makedonije**

Predsjedavajući Predstavničkog doma PSBiH Milorad Živković i zamjenik predsjedavajućeg Predstavničkog doma PSBiH Niko Lozančić boravili su, 7. i 8. aprila 2008., u zvaničnoj posjeti Sobranju Makedonije.

S njima su putovali Slaven Katičić, savjetnik zamjenika predsjedavajućeg Nike Lozančića, i Jelena Rajaković iz Sektora za međunarodne odnose i protokol.

Tokom boravka u Skoplju rukovodstvo PDPSBiH sastalo se s najvišim zvaničnicima Republike Makedonije: Ljubišom Georgijevskim, predsjednikom Sobranja Republike Makedonije; Brankom Crvenkovskim, predsjednikom Republike Makedonije; Antonijom Milošoskim, ministrom vanjskih poslova Republike Makedonije, i Živkom Jankulovskim, zamjenikom predsjednika Vlade Republike Makedonije.

Prilikom susreta s predsjednikom Sobranja Ljubišom Georgijevskim istaknuto je obostrano zadovoljstvo odnosima između Bosne i Hercegovine i Makedonije i naglašeno da nema otvorenih pitanja između ove dvije zemlje.

On je čestitao na prvom sporazumu koji je BiH potpisala s Evropom i podsjetio da Makedonija još nema datum za početak pregovora.

Georgijevski je izrazio nadu da se situacija na Balkanu smirila i da će uskoro sve zemlje iz regiona biti članice EU.

On je upoznao delegaciju PSBiH sa situacijom u Makedoniji kad je u pitanju članstvo te zemlje u NATO-u. Također je govorio od namjeri Makedonije da prizna nezavisnost Kosova tek kada se završi demarkacija granica između Makedonije i Kosova.

Predsjedavajući Predstavničkog doma PSBiH Milorad Živković izrazio je podršku nastojanjima Makedonije da postane članica NATO-a i EU i upoznao prisutne sa situacijom u BiH, posebno ističući pitanja reforme policije i ustavnih promjena.

Nakon sastanka s predsjednikom Sobranja, Živković se na posebnoj sjednici Sobranja Makedonije obratio poslanicima.

U svom govoru predsjedavajući PDPSBiH naglasio je potrebu parlamentarne, ali i svake druge saradnje, između zemalja jugoistočne Evrope, te da je regionalna saradnja od presudnog značaja.

Živković je ocijenio da je saradnja između Makedonije i Bosne i Hercegovine dobra u svim oblastima i da nema otvorenih pitanja, što ukazuje da bi odnosi u budućnosti mogu biti samo bolji.

Govoreći o aktuelnim događanjima u Bosni i Hercegovini, Živković je kao prioritetan vanjskopolitički interes BiH istakao euroatlantske integracije.

On je rekao da je, nakon završetka tehničkih pregovora o Sporazumu o stabilizaciji i pridruživanju prošle godine, otvorena tromjesečna kriza u BiH koja je riješena usklađivanjem

poslovnika o radu oba doma PSBiH, a paraf na Sporazum, 4.12.2007., došao je kao nada u bolje sutra i kao šansa za udarnički nastavak rada na svim reformskim procesima.

Živković je istakao da smo svjesni da dolazimo u fazu kada ćemo morati pristupiti ispunjavanju preuzetih obaveza ali i da se pokažemo kao pouzdan partner koji ispunjava dogovorene obaveze i koji ima jasnu viziju svoje budućnosti unutar Evropske unije.

Dejtonski mirovni sporazum donio je mir u BiH ali i odredio ustavno uređenje Aneksom 4 kao zemlje sastavljene od dva entiteta: RS-a i FBiH u kojoj žive tri naroda: Srbi, Hrvati i Bošnjaci.

Živković je naglasio da je svjestan da to nije idealno rješenje i da će se u narednom periodu ići u ustavne promjene, ali i da je siguran da se uspjeh može postići u BiH samo ako se beskrajne diskusije zamijene predanim radom i saradnjom zasnovanom na poštovanju, konsenzusu i kompromisima.

Osnova buduće politike BiH trebalo bi da bude zasnovana na Evropskom partnerstvu i obavezama koje iz njega proističu.

Živković je podsjetio poslanike u Saboru da je potrebno ubrzati potpisivanje usaglašenih sporazuma između ove dvije zemlje kao što su: Sporazum u oblasti obrazovanja i nauke, Sporazum o saradnji i uzajamnoj pomoći u oblasti carina, Sporazum o izbjegavanju dvostrukog oporezivanja i Protokol o veterinarskoj saradnji.

Živković je tom prilikom pokrenuo i inicijativu za zaključivanje novih bilateralnih sporazuma, kao što su:

- sporazum o željezničkom i voednom prijevozu,
- sporazum o dvojnem državljanstvu,
- protokol o saradnji u procesu evropskih integracija.

Na sastanku s predsjednikom Makedonije Brankom Crvenkovskim istaknuto je da je atmosfera u Makedoniji prijateljska i puna simpatija prema BiH, što proističe iz tradicije i vremena kada smo živjeli u istoj zemlji i što predstavlja dobru osnovu za međusobne odnose.

Predsjednik Crvenkovski naglasio je da saradnja među parlamentima ove dvije zemlje daje kredibilitet saradnji među vladama Makedonije i BiH.

Govoreći o prioritetima u političkom životu Makedonije, on je rekao da toj zemlji predstoji krupna odluka da li da nastavi s pregovorima o članstvu u EU i NATO-u, dodajući kako sumnja da će Grčka blokirati ulazak Makedonije i u EU, te da će ta odluka imati dugoročne i ozbiljne posljedice.

Tokom sastanka s ministrom vanjskih poslova Makedonije Antonijom Milošoskim rečeno je da je saradnja između dvije zemlje intenzivirana, ali da treba produbiti trgovinske odnose.

Živković je govorio o temama koje su zajedničke za obje zemlje, euroatlantskim integracijama i regionalnoj stabilnosti i saradnji.

Delegacija PSBiH sastala se i sa zamjenikom predsjednika Vlade Makedonije Živkom Jankulovskim koji je podvukao značaj ekonomske saradnje. On je predložio intenzivnije razgovore na nivou ministara i privrednih komora, te povezivanje privrednika i biznismena, kako bi međusobna razmjena robe i kapitala bila što veća.

Tokom zvanične posjete Makedoniji, Milorad Živković je predsjedniku Poslaničke grupe u Saboru Makedonije za saradnju s PSBiH Esadu Rahiću i zvanično uručio dokument o osnivanju grupe prijateljstva PSBiH za saradnju sa susjednim zemljama.

Izvjestaj pripremila

Jelena Rajaković

Prilog:

- Obraćanje Milorada Živkovića u Saboru Makedonije